



REPUBLIKA E KOSOVES-REPUBLIKA KOSOVA-REPUBLIC OF KOSOVO
KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD CIVIL SERVICE OF KOSOVO



Pranuar / Dorezuar Prilicohet/Prilicohet Received/Delivered	28 - 12 2022	2 viti god year	
Organ / Njësia Organ / Jednica Org - Unit	Nr Prot Br Prot Prot No	Shtojca Prilicohet Appendix	Sasia Kolicina Quantity
SKLMB/SHK	8548/2022		114



Republika e Kosovës Republika Kosova - Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.1057/2022

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Arben Mehmeti- kryetar, Malsore Gashi-Bajraktari dhe Ardita Haxhnikaj-Demi-anëtarë, me Ardita Perçuku-Shyti-Zyrtare e Lartë për Bashkëpunim Profesional në cilësinë e procesmbajtëses, ka shqyrtuar ankesën A.nr.1057/2022 të datës 24.11.2022 të parashtruar nga ankuesi

kundër Vendimit me Nr.Ref.592/2022 të datës 03.11.2022 të Ministres së Punëve të Jashtme dhe Diasporës, në çështjen juridike "ndërprerje e marrëdhënies së punës", duke vepruar në pajtim me nenin 6 paragrafin 1 nën paragrafin 1.1, nenin 16 paragrafin 3 dhe nenin 18 paragrafin 1 nën paragrafin 1.8 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim, me datën 28.12.2022, mori këtë:

V E N D I M

Këshilli i Pavarur Mbikëqyrës për Shërbimin Civil të Kosovës, *shpallet jo kompetent* për të vendosur lidhur me ankesën A.nr.1057/2022 të datës 24.11.2022 e parashtruar nga ankuesi

A r s y e t i m

Ankuesi përmes përfaqësuesit me autorizim, me datë 24.11.2022 ka parashtruar ankesën me numër protokollit 7375/2022 në Këshillin e Pavarur Mbikëqyrës për Shërbimin Civil të Kosovës, kundër Vendimit Nr.Ref.592/2022 të datës 03.11.2022 të Ministres së Punëve të Jashtme dhe Diasporës (tutje MPJD), për shkak të shkeljeve të dispozitave materiale dhe procedurave ligjore.

Këshilli i Pavarur Mbikëqyrës për Shërbimin Civil të Kosovës bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datën 30.11.2022 ka proceduar kërkesën për përgjigje në ankesë tek Ministria e Punëve të Jashtme dhe Diasporës. Ndërsa Këshilli me datën 13.12.2022 ka pranuar shkresat e bashkangjitura lidhur me ankesën e ankuesit.

Kolegji për Shqyrtimin dhe Vendosjen e Ankesave ka administruar këto prova: Ankesën me numër të protokollit 7375/2022 të datës 24.11.2022 të parashtruar nga ankuesi në Këshillin e Pavarur Mbikëqyrës për Shërbim Civil të Kosovës; Autorizimin e datës 07.11.2022; Vendimin me numër Nr.Ref.592/2022 të datës 03.11.2022; Vendimin me numër Nr.Ref.395/13 të datës 22.07.2013; Vendimin me numër ZSP/920/14 të datës 11.08.2014; Akt emërimit e ankuesit me numër 141 të datës 11.08.2014; Vendimin me numër Nr.Ref:038/2016 të datës 10.02.2016; Vendimin me numër 028/2017 të datës 01.02.2017; Vendimin me numër Nr.61/2018 të datës 22.01.2018; Vendimin me numër Nr:ZSP-123/2016 të datës 07.10.2016; Vendimin me numër Nr.Ref:954/2018 të datës 07.12.2018; Ndryshimin dhe plotësimin e akt emërimit të ankuesit me numër Nr-141/2016 të datës 31.10.2016; Kërkesën për përgjigje në ankesë të datës 30.11.2022 nga Këshilli i Pavarur Mbikëqyrës për Shërbimin Civil të Kosovës; Përgjigjen në ankesë të datës 13.12.2022 nga Ministria e Punëve të Jashtme dhe Diasporës lidhur me shkresat e bashkangjitura të lëndës; Vendimin me numër Nr.140/11 të datës 21.07.2011; Konkursët e datës 22.07.2011; Vendimin me numër Nr.Ref:395/13 të datës 22.07.2013; Vendimin me numër Nr.Ref:684/2018 të datës 24.07.2018; Vendimin me numër Nr.Ref:476/2014 të datës 07.07.2014; Kërkesën për punësim të datës 19.02.2019; Vendimin me numër Nr.Ref:592/2022 të datës 03.11.2022; Listën e kandidatëve-aplikuesve për misione diplomatike gusht 2011.

Kolegji për Shqyrtimin dhe Vendosjen e Ankesave pas administrimit të shkresave të lëndës, konstaton se Këshilli i Pavarur Mbikëqyrës për Shërbimin Civil nuk është kompetent për të vendosur lidhur me ankesën A.nr.1057/2022 të datës 24.11.2022 të parashtruar nga ankuesi

sepse:

Nga analizimi i provave materiale Kolegji ka gjetur së Ministri i Ministrisë së Punëve të Jashtme me Vendimin Nr.140/11 të datës 21.07.2011 ka miratuar shpalljen e Konkursit për përfaqësues diplomatik dhe konsullor në misionet diplomatike dhe konsullore të Republikës së Kosovës. Bazuar në këtë vendim, Ministria e Punëve të Jashtme më datë 22.07.2011 shpall konkursin për drejtues dhe nëpunës të tjerë të misionit konsullor dhe për anëtarë të misionit diplomatik, e në të cilin konkurs kishte aplikuar edhe ankuesi. Me tej, nga shkresat e lëndës rezulton së lidhur me këtë procedurë konkurrimi ishte organizuar vetëm testimi i gjuhëve të huaja dhe intervista me gojë, dhe nga kjo fazë nuk ka dëshmi për vazhdimin e mëtejme të procesit të rekrutimit në fjalë, gjegjësisht pranimit të ankuesit në pajtim me dispozitat e aplikueshme për shërbimin e jashtëm dhe shërbim civil.

Rrjedhimisht nga shqyrtimi i provave materiale, Kolegji ka konstatuar së ankuesi bazuar në Vendimin Nr.Ref.395/13 të datës 22.07.2013 të Ministrisë së Punëve të Jashtme emërohet anëtarë i shërbimit të jashtëm të Republikës së Kosovës duke i 'u caktuar grada diplomatike "Sekretar i dytë" dhe njëkohësisht i njëjti është caktuar të shërbej në Ambasadën e Republikës së Kosovës në Mbretërinë e Arabisë Saudite. Sipas Vendimit me numër Nr.Ref: 476/2014 të datës 07.07.2014, ankuesi tërhiqet nga misioni si Sekretar i dytë në Ambasadën e Republikës së Kosovës në Mbretërinë e Arabisë Saudite dhe është caktuar të shërbejë në njërin nga Departamentet përkatëse të Ministrisë së Punëve të Jashtme. I njëjti sipas Vendimit me numër Nr.Ref:ZSP-123/2016 të datës 07.10.2016 nga Sekretari i Përgjithshëm i Ministrisë së Punëve të Jashtme është transferuar në mënyrë të përhershme në pozitën si Zyrtar i lartë për integritet ekonomike-Departamenti për Diplomaci Ekonomike në të njëjtin institucion. Tutje sipas Vendimit me numër Nr.Ref:684/2018 të datës 24.07.2018 i ipet grada Sekretar i parë, dhe njëkohësisht sipas Vendimit me numër Nr.Ref:954/2018 të datës 07.12.2018 është caktuar të shërbej në misionin e posaçëm në Athinë/Republikën Helenike të Greqisë.

Ministrja e Ministrisë së Punëve të Jashtme dhe Diasporës me Vendimin Nr.Ref: 592/2022 të datës 03.11.2022 ka shfuqizuar Vendimin më numër reference 395/13 të datës 22.07.2012 lidhur me emërimin e ankuesit në shërbim të jashtëm si dhe vendimin nr.ref.954/2018 të datës 07/12/2018, mbi bazën ligjore se emërimi i ankuesit në shërbimin e jashtëm është bërë në kundërshtim me nenin 20 të Ligjit Nr.03/L-022 për Shërbimin e Jashtëm si dhe caktimin e të njëjtit që të shërbejë në Athinë/Republikën Helenike të Greqisë.

Ankuesi në ankesën e parashtruar në Këshillin e Pavarur Mbikëqyrës për Shërbimin Civil të Kosovës pretendon së vendimi i kundërshtuar më ankesë karakterizohet me shkelje ligjore dhe procedurale, duke i propozuar Këshillit të Pavarur Mbikëqyrës që ta aprovoj ankesën e ankuesit dhe ta anuloj vendimin e datës 03.11.2022 të Ministres së Ministrisë së Punëve të Jashtme dhe Diasporës.

Në kuptim të provueshmërisë së ankesës, Kolegji ju referua dispozitave të Ligjit Nr.03/L-149 për Shërbim Civil të Republikës së Kosovës i aplikueshëm në kohën e emërimit të ankuesit në shërbim të jashtëm, përkatësisht nenit 3 paragrafit 4 ku përcaktohet se: *4. Personeli diplomatik dhe konsullor, si dhe personeli administrativ i dërguar jashtë vendit ose i punësuar në Ministrinë e Punëve të Jashtme të Kosovës, është pjesë e Shërbimit Civil të Kosovës dhe i nënshtrohet këtij ligji dhe legjislacionit përkatës në fuqi, si dhe nenit 8 të Ligjit Nr.03/L-044 për Ministrinë e Punëve të Jashtme dhe Shërbimin Diplomatik me të cilin parashihet: Anëtarët e Shërbimit Diplomatik të Kosovës, përveç të emëruarve politik, janë pjesë e Shërbimit Civil të Kosovës dhe personeli i tij i nënshtrohet të njëjtave paga, kërkesa dhe kushte të punës, përveç nëse parashihet ndryshe me këtë ligj ose me ligje tjera ose akte nënligjor, dhe rrjedhimisht në kuptim të këtyre dispozitave ligjore Kolegji konstaton se përveç të emëruarve politikë, nëpunësit e shërbimit të jashtëm përfshirë personelin diplomatik, konsullor dhe personelin administrativ të punësuar në Ministrinë e Punëve të Jashtme apo të angazhuar në shërbim të jashtëm, kanë statusin e nëpunësit civilë dhe së pranimit i tyre në shërbim të jashtëm duhet të bëhet në pajtim me dispozitat e legjislacionit për shërbim të jashtëm dhe legjislacionit të aplikueshëm për shërbim civil, andaj mbi këtë bazë ligjore, si dhe duke marrë parasysh faktin se ankuesi ishte emëruar në shërbim të jashtëm mbi bazën e vendimit të Ministrit të Ministrisë së Punëve të Jashtme, e meqenëse me asnjë provë nuk vërtetohet se i njëjti ka themeluar marrëdhënie të punës në shërbim civil përmes nënshkrimit të Aktit të emërimit ashtu siç përcaktohej me nenin 19 paragrafin 1 të Ligjit Nr.03/L-149 për Shërbimin Civil të Republikës së Kosovës me të cilin parashihej se: *Nëpunësit civilë themelojnë marrëdhënien e punës pas përfundimit me sukses të procedurave të pranimit të përcaktuara me këtë ligj dhe me aktet përkatëse nënligjore dhe pas pranimit të një shkrese të emërimit brenda tridhjetë (30) ditëve pas përfundimit të procedurës nga institucioni kompetent në të cilën do të gjejë punë nëpunësi i ri civil....*, Kolegji duke u bazuar në nenin 6 paragrafin 1 nën paragrafit 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, ku përcaktohet se Këshilli është kompetent për të shqyrtuar vetëm ankesat e nëpunësve civilë dhe kandidatëve për pranim në Shërbimin Civil, konstaton se Këshilli i Pavarur Mbikëqyrës për Shërbimin Civil të Kosovës nuk është kompetent për të vendosur lidhur me ankesën e ankuesit si në dispozitiv të këtij vendimi.*

Bazuar në rrethanat si me lartë, Kolegji për Shqyrtimin dhe Vendosjen e Ankesave pas analizimit të provave të lëndës, e duke u bazuar në nenin 18 paragrafi 1 nën paragrafi 1.8 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, vendosi si në dispozitiv të këtij vendimi.

Vendimi hyn në fuqi në ditën e nënshkrimit nga Kryetari i Kolegjit.



Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në gjykatën kompetente, Gjykatën Themelore në Prishtinë/ Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda, A.nr.1057/2022, datë 28/12/2022

Ardita Perçuku-Shyti

Zyrtare e Lartë për Bashkëpunim Profesional



Vendimi i dërgohet:

- Përfaqësuesit të ankuesit;
- Ministres së Ministrisë së Punëve të Jashtme dhe Diasporës;
- Sekretarit të Përgjithshëm të Ministrisë së Punëve të Jashtme dhe Diasporës;
- Udhëheqësit të Burimeve Njerëzore në Ministrinë e Punëve të Jashtme dhe Diasporë dhe
- Arkivit të KPMSHCK-së